



D'n Dreumel

De staat ván Hòrs

Geacht College ván Burgemeister en Wethalders, geachte gemaenteraad.

Nao en korte maar verrektes drukke regeerperiode, wille weej gaer oos bevindinge met oow deile en verantwoording aflegge vur oos beleid ván de drie carnavalsdaag.

Deze verantwoording hebbe weej genumd: De staat ván Hòrs en weej haope zoë en beejdrage te levere aan en nog baeter bestuur ván dees gemaent, maar ok aan enne nog schonnere vastenaovend vur iederiën in Hòrs in 't algemeen en miene opvolger, de vief-en-vieftigste Dreumelpreens in 't bezoonder.

Geej zult waal daenke dat ik nevvè mien schoon loëp umdat ik 't de ganse tied ovver 'weej' heb. Dat is ni de pluralis majestatis maar ik voer heer 't waord names mien twië adjudante en meezelf. En names niemes anders.

Vurdát ik oos aanbevelinge veurlaes, moot ik nog iërst kwiët dat 't en hiële oëtdaging wár um dat, wát jullie aaf in en gans jaor doon, in drie daag te proppe. En dán hebbe jullie dit schrikkeljaor ok nog enne daag extra! Maar aas ik straks oëtgepraot ben, zulde 't met meej aens ziën dat weej heer hiël good in geslaagd ziën.

Ovverwaegende:

Ten iërste: De traditionele foto vur tante Bet ván alle preense oet de regio. Nae, hoe ze dat in Venroy probere te organisere is gans beneeje oze stand. Weej haope dat weej same met burgemeister Van Rooij de Piëlhaze d'r ván kunnen overtuige dat weej zoëiets met veul miër waardigheide en fiëstelik vertoën in Hòrs kunne organisere. Lot ze in Venroy maar 's iërst 't parkere gaon regele. En dán hebbe we ok de regie um d'r vur te zörge dat de Dreumelpreens op de goië plaats zit waar heej ok thoes huurt: in 't midde op de vurste reej.

Ten twedde: Aas gooi gemaentebestuurders kenne jullie ongetwiefeld 't carnavalsliedje Goje zin ván zanggroep 'Waer of gen waer'. Dat liedje is oowe leidraad vur de verdere ontwikkeling ván de centrumplanne in Hòrs. In dit liedje zinge ze 't volgende:
"Loëp ik door Hòrs dán krieg ik hiële goje zin
Want ik zie zo bliëj dat ik enne echte Hòrster Dreumel bin."
Dat geveul moote we waarborge vur de toekomst en daorvur is de aanleg van 't Gasthoësplein enne must (um 't in good Hòrster te zegge). Dreumels hechte veul belang aan en gooi en veilige verbinding tussen de Merthal en de kefee's in 't dörp. 't Zuij pas echt af ziës aas d'r langs die route ok nog 's enne kiër openbare toilette zuije kome. Geej wet waal, ván die toilette die geej door de waeks gewoën in de grond kunt laote zakke. De bezoekers ván de carnavalsparade op vastenaovendszaoterdag zullen oow bevrubiëld ontiegelijk dankbaar ziën.

Ten derde: Weej ziën aerg begaon met de gezondheid ván alle Dreumels en weej ondersteune de planne um de gezondste regio te ziën in 2025. De vastenaovend levert en groëte beejdrage aan de gezondheid in oos gemaent. Bliëje meense laeve langer. Weej daenke gaer mei um richting 2025 de nuëdige fiëste te organisere.

Ten verde: Die planne ván jullie vur en sportzone in de Moelbaerebos: die wille weej ok gaer ondersteune. Weej zeen vastenaovend aas topsport, en dat maerke vuraal achteraf op aswoensdag. Oos advies zuij ziën dat de polonaise en vast onderdiël wurd ván de warming-up beej elke sport en ok beej de schoëlgym.

Ten viefde: Weej ziën d'r veurstander ván dat de gemaent 't toeristisch beleid baeter afstemd op de vastenaovend. 't Carnavalstoerisme nimt hand ovver hand toe in Hòrs en elk jaor moge weej miër boëthorster gaste verwelkome. De toeristische bedriëve in Hòrs plukke heer de vruchte ván. De gemaent hoof daor niks vur te doon. En carnavalstoeristenbelasting is heer op ziën plaats. Maar dán waal door de gemaent te betalë aan carnavalsverieniging d'n Dreumel. Ik haop dat weej daor binnekort afsprake ovver kunne make.

Ten zesde: Elk jaor organisere weej en heren- en 'n dameszitting in Hòrs. De dameszitting is heer teggenaover beej De Lange. Maar de herenzitting is wiedeweg in de Moelbaerebos. En aas de kels op 't end ván d'n daag oppe fiets naor 't dörp kome, levert dat duk gevaorlijke verkiërssituaties op. Meugelijk kunde oow daor wát beej veurstelle. 'Um durrum de vraag of we vur de herenzitting volgend jaor deze raodszaal moge gebroëke. In 't kader ván de veiligheid mein ik dat geej heer gen nae tegge kunt zegge.

Trouwes, in 't kader ván de veiligheid kán ik de gemaent names miene boëtdörpse adjudant bedánke dat krek vur de vastenaovend straatverlichting agelag is op de Hagelkruuswaeg. Desondanks is heej mei de waeg kwiet gewest, maar dat is ni de verantwoording ván de gemaent.

Ten zuvvende: Aas weej de gezondste regio wille ziën moote weej zörge dat de meense miër vitamines binne kriëge. Beej de volgendë carnavalsparade op vastenaovendszaoterdag wille weej d'r vur zörge dat bezoekers ok grunte en fruit kunne aete beej enne kraom ván de booremaert. Weej zien d'r gen veurstander ván dat d'r ok boënesoep te aete is, want de vitamine die meense heerbeej binnekriëge waere teniet gedaon door de schadelijke CO2 oëtstoët deen boënesoep achteraf tewaeg brenge. En aas 4500 meense tegeliekertiëd boënesoep gehad hebbe... Die ravage is waarschienlijk ni te ovverzeen.

Ten achtste: De agrarische sector in Hòrs stiëd aalt aope vur neeje impulse. Meense vraoge teggeswaordig um 100 % natuurlijke voedingsmiddelen en um lokale producte. 't Liekt oos en gooi idee aas de boore zich miër gaon toelegge op 't brouwe ván en eige Dreumelbeer. 't Hoëfakantoër De Roskam van de vroegere brouwereij Vullinghs is nog te koëp en 't zuij en moëi gebaar ziën aas de gemaent dat gebouw kuëpt um deze ontwikkeling te ondersteune.

Ten niggende: 't Groëtste verschil tusse de vastenaovend in Köln en Hòrs is dat 't preenselijk trio in Köln drie daag lang in en sjiëk hotel slüpt en in Hòrs ni. Met de planne vur Herberg de Troost in 't vuroëtzicht stelle weej veur dat de preens en de adjudante ván d'n Dreumel daor straks drie daag lang vur niks onderdaak kriëge en dat de naam dán verandert wurd in Herberg de Proost.

En aas Herberg de Troost gerealiseerd is leet daor nog de schonne taak vur de gemaenteraad um aas hoeder ván oos culturele erfgoed, vur ozen culturele tempel de Mèrthal bescherming aan te vraoge aas Unesco wereld-erfgood. Mocht dat te hoëg gegrepe ziën, dán zien weej ok al tevreeje met de gemaentelijke monumentestatus vur de Mèrthal.

Ten tiende: Raodsleeje moote 's wát dukker onder de meense kome. In 't kader ván 't project Enne gooië raad vur de raad biede weej raodsleeje de meugelijkheid um volgend jaor enne daag stage te loëpe beej de Raod ván 11 um zoë 't contact met oos inwoëners wer te verstevige. En dán hedde tenminste ok 's enne kiër wát um te lache.

Ten elfde en letste: D'r is enne wedstrijd onder kunstenaars in Hòrs oëtgeschreve vur en neej staatsieportret in de raodzaal. Weej ziën d'r schoow vur dat de kunstenaars allemaol met en portret ván ozze keuning aan kome zette. Maar dán halde ze d'r gen raekening mei dat deen keuning elk jaor drie daag lang niks te zegge haet heer umdat d'r dán enne preens de baas is in Hòrs. 'Um durrum hebbe weej alves en eige staatsieportret meigebrocht. Weej zuije wille vraoge of dit staatsieportret met terugwerkende kracht drie daag lang opgehange kán waere in deze raodszaal.

Besloëte weej: mit d'n haop dat miene opvolger heer 't volgend jaor wer zal staon en dat dán zal bliëke dat oos aanbevelinge zin gehad hebbe, zegge weej vur nauw: Alaaf!

Gegaeve, Hòrs ach márt 2016 daor den ver-en-vieftigste Dreumel Preens
Preens Ted d'n Ierste tezame mit zien adjudante Rob & Leon.